

東
華
續
錄

東華續錄

乾隆十九

臣王先謙敬編

臣周澍蕃恭校

乾隆九年甲子春正月辛巳諭前因大學士陳世倌告假回籍懇求開缺朕曾降旨不必開缺令尙書史貽直協辦閣務今大學士徐本又復患病調理尙需時日况陳世倌亦稱在家頗須耽閣不能卽回供職見今內閣辦事人少著史貽直實授大學士吏部尙書員缺著戶部尙書劉於義補授協辦大學士事務其戶部尙書員缺著張楷補授○陳惠華緣事解任以王安國爲兵部尙書策楞署廣東巡撫由廣州將軍署○戊子諭直省州縣地方繁簡不同屬員中才具短長亦不一是以准各省督撫酌量人地相宜題請調繁調簡以收器使之益惟是調繁之員該督撫旣已特疏保舉向後

非踰閑蕩檢未必不格外優容調簡之員該督撫既已置之下考
向後縱奮勉向上未必肯卽登薦章朕看各督撫於屬員調繁之
後因其貪劣改操而檢舉糾參者尙偶有之至於調簡之後或因
其政績可觀復行薦拔者十不獲一此則成見私意之未化非虛
公察吏成就人才之道也嗣後督撫等於調繁調簡之員均當秉
公體察屏去成心覘其後效凡先舉而後參者國家原有檢舉之
條若先調簡而後保薦亦著於疏內摺內聲明具奏如此則被薦
者必倍加儆惕之心卽更調者亦獲黽勉自新之路庶整飭吏治
之一策歟○庚寅駐藏副都統索拜奏據郡王頗羅鼐告稱上年
十月夷使喇嘛尙卓特巴宰桑吹納木喀至大小廟拜佛謂頗羅
鼐曰我噶爾丹策零聞拉達克人言土伯特黃教盛興民生亦日
安樂此皆 大皇帝廣興黃教撫輯羣生所致又曰噶勒招穆倫

河邊之策地方原是溫都遜喇嘛等坐禪之廟聞此廟破壞我噶爾丹策零令我等攜帶銀兩而來欲煩王子代爲修廟令溫都遜眾喇嘛照常坐禪頗羅爾答曰我仰賴大皇帝洪恩豈不能修一廟宇但喇嘛坐禪常在上蓋房所以策地方不必重修況汝台吉噶爾丹策零並未奏請在彼處修廟我未奉大皇帝諭旨何敢擅行十一月第巴喇嘛與宰桑巴雅斯瑚朗謂頗羅爾答曰我等到大小各寺廟熬茶留心細看宗喀巴佛之黃教實屬比前興旺眾喇嘛亦覺齊整甘珠爾經丹珠爾經甚是靈應乞王子將汝誠心扶助黃教所行一切事體寫明付我等攜歸與噶爾丹策零觀看頗羅爾答曰我本土伯特地方一微小台吉蒙大皇帝隆恩拔至郡王振興黃教成就甘珠爾丹珠爾經以安土伯特之人此皆仰賴大皇帝之恩非我力所能及若將我如何振興黃

教之處寄知噶爾丹策零我自愧無能不敢矜誇此事亦不可行
第巴喇嘛宰桑巴雅斯瑚朗又曰我準噶爾地方並無好額木齊
噶爾丹策零分付我等熬茶事畢將好額木齊與通經好大喇嘛
延請一位帶回乞王子卽爲給發前去頗羅鼐答曰汝等欲請好
額木齊與通經好大喇嘛並未奏請 大皇帝旣未奉 大皇帝

諭旨此事我何敢專主自夷使至藏後言語情形理合奏明得旨

頗羅鼐所辦一切事務俱極得體甚屬可嘉著傳旨獎諭○庚子
命尙書公訥親查閱河南山東江南營伍並勘驗河工海塘○王

安國丁憂以彭維新爲兵部尙書晏斯盛爲戶部侍郎起許容署

湖北巡撫

原任湖南巡撫

○德新以母老請留京補授內閣學士以留保

爲盛京工部侍郎

由內閣學士遷

○以彭樹葵爲倉場侍郎

由左副都御史遷

○

壬寅賜準噶爾台吉噶爾丹策零敕書曰爾奏疏內稱據使者吹

納木喀歸奉到諭旨我屬前赴西藏之人准由噶斯路行走賜助牲畜盤費托爾輝地方每年遣派二三十人前往查閱是以遣使者圖爾都具奏恭請聖安朕欣悅嘉納又奏稱曾經奉旨來肅州貿易之人無論何時乘便而來來京貿易之人願赴京者聽其來京若以京師遙遠准在甘州涼州蘭州西安等處聽其所願貿易其貿易時與通使同往街市購買需用貨物等語此則與朕原降諭旨迥異故我國大臣向爾使者圖爾都訊問據云大皇帝諭旨內原未諭及此事吹納木喀等曾向大人言及以爲大人業已允行是以歸而誤告噶爾丹策零噶爾丹策零誤以爲大皇帝諭旨故寫入奏疏等語大凡使者往返行走語言繁多隻言片語豈無舛錯朕亦不咎既係爾使者誤告爾宜仍照前旨遵行其來肅州貿易之人於應來年分無論何時隨到皆可准其進邊貿易至來

京貿易之年爾等以京師遙遠難以前來欲在肅州貿易亦可若甘州涼州等處地方褊小商賈聚集無多與爾等交易無益朕爲大皇帝事若可行則施恩准行和好之事必慮久遠旣已議定永遠遵守不爽始爲有信今特頒詔旨付爾使齋回隨敕賜佛二尊並賞各色段十端錦段絁段各八端玻璃器十五事○命史貽直爲文淵閣大學士兼吏部尙書○癸卯 上奉 皇太后謁

泰陵啓鑾○貝勒允祜遺疏聞得旨二十二叔貝勒患病薨逝朕心深爲軫悼著大阿哥卽攜茶酒往奠一切應用各項俱由該部移取官物彼處事務著莊親王等料理已有旨了應得卹典仍著察例具奏○丙午 上謁 泰陵奉 皇太后回鑾

二月庚戌 上奉 皇太后幸南苑 上行圍○駐藏副都統索拜奏郡王頗羅鼐告臣等云準噶爾來使第巴喇嘛吹納木喀等

於啓行前一日過我辭別據吹納木喀云自今以往我台吉噶爾丹策零於大皇帝前永矢恭順聞揚黃教不但兵戈永息羣生亦皆樂業不知如何能得結信於大皇帝可以永久不渝我答以大皇帝包容四海以天地爲心與日月並明中外並無歧視諸部之人悉皆一體同仁卽如爾等至藏熬茶大皇帝格外加恩賞給馬駝路費俾極充裕爾等將還又加恩賜爾熬茶之事得以完善者悉由爾台吉於大皇帝前恭順有加誠心懇請之所致也聞爾台吉敬奉黃教自今以後惟有恭敬釋迦佛常如臨之在上虔心供奉事大皇帝恭謹彌篤一切悉遵諭旨訓誨必得厚福我土伯特雖爲黃教藏地前此初無如此蕃盛唐古特人亦從無此安樂後因大皇帝廣闡黃教休養眾生是以自五世達賴喇嘛班禪額爾德尼至我頗羅鼐悉予印授封疊荷隆恩有加

無已人物愈加庶富此蒙古唐古特人所共知者爾歸將我言告知爾台吉噶爾丹策零是否任其自擇吹納木喀等皆以爲然後又云前聞入藏人言此地唐古特人不能乘馬兵械亦不完備今我至喀喇烏蘇時爾子扎薩克台吉珠密納木扎爾率兵迎接將軍侍郎觀爾地之人乘騎兵械亦甚可觀我答以此乃興黃教之地素不以武備爲事因爾前台吉起兵襲藏我唐古特始重武備悉加意練習且大皇帝加恩令我統轄藏事我悉力簡閱甲兵繕治器械他部卽有以兵犯我邊圉者亦久已有備蒙古唐古特兵藉大皇帝天威足資抵禦等語吹納木喀等唯唯而退得旨頗羅鼐與夷使答應言語極爲得體此皆伊平日感朕厚恩實心報效是以所言皆合朕意實屬可嘉著傳諭頗羅鼐知之○辛亥諭上年御史沈廷芳條奏行營事件顛倒謬妄金落保奏孫嘉淦

袒護師門二人身居言路顯挾私心不得不加處分以示懲儆是以降旨分別降革諒伊等此時亦自知愧悔矣朕以廣開言路爲心於諸言官甯可待之以寬沈廷芳金溶俱著復還原官遇缺補用以觀後效○乙卯 上奉 皇太后還宮○丙辰諭給事中陳大玠奏許容捏款誣陷謝濟世以致民怨沸騰許容身爲大臣敢肆其欺罔罪旣無逃於刑書位何堪列於寮案伏乞收回成命另簡賢員庶使欺罔者知儆而於封疆有益等語鄒一桂所奏亦同朕因湖北巡撫員缺一時不得其人許容久歷外任頗能辦事是以宥過令其署理以觀後效今陳大玠旣如此陳奏其言亦是許容不必署理湖北巡撫印務晏斯盛著仍留原任戶部侍郎員缺著汪由敦調補兵部侍郎員缺候朕另降諭旨向曾用趙宏恩石麟皆以言官糾論而罷夫人材難得豈可一棄終不復用若果新

進之人師師濟濟朕亦何樂於必用已罷之人用人之難外臣何
由得知其出於不得已者往往類此然言官各抒己見陳奏朕前
乃其職掌今陳大玠鄒一桂兩人所奏相合顯有商謀扶同之處
且近日有旨金溶沈廷芳著仍以御史用獨非棄而復用者乎言
官何無論列者此風亦不可長但朕旣不用許容此中情事姑不
究問莫謂朕終不知也將此並諭諸臣知之○己未安甯丁憂以
憂必達署江南布政使由郎中署○甲子吏部議奏解任兵部尙書陳
惠華將伊弟陳惠正密封奏摺及部科揭帖有意隱諱不奏應照
例革職得旨陳惠華應照部議革職但兄爲弟隱與他人有聞著
從寬降二級調用○以勵宗萬爲左副都御史由通政使遷○乙丑
上御經筵○國子監帶領博士黃施鶚引見諭黃施鶚著仍留國
子監博士之任令其啓迪諸生如果勤於訓課爾監具奏請旨加

以升銜示之鼓勵朕觀今之秉鐸者與肄業者惟以成均爲仕路之捷徑所爲如古之學者爲己者百無一二爾祭酒等應知此爲世道人心之害使博士與諸生沈潛踐履則天爵修而人爵隨之矣如謂惜其材品或致淪棄且別無鼓舞之方殊不知天下之大小縣之多豈少此一二能幹之縣令乎加之升銜而不離其任則其身已榮且成全多材是化一二而百十也爾監其永遵之○丙寅命直隸天津河間等處栽柳開井以廣地利○發京倉官豆立局平糶○王申截留山東漕糧五萬石貯臨清德州二倉備用○以陳惠華爲兵部左侍郎○癸酉諭積貯爲備荒之要務不可不爲豫籌從前因採買過多市價昂貴是以降旨停止今停止已及一年各處米價總未能平減如常揆厥所由米價之貴原非一歲驟長自不能一時驟平蓋奸商狡獪之故智猶存而百姓圖獲厚

利之積習未改也夫採買既有妨於市價而倉儲又不可以虛懸雖令各督撫按地方情形應買則買應停則停相機籌畫不得膠執定見但年歲豐歉不齊卽隨時零買恐所入不抵所出終非經久之計朕思欲停採買而使廩積仍不至有虧惟有復開外省本色捐監之例蓋米價之貴貴於官買不貴於捐監官買則商民聞風增長或吏胥作奸舞弊往往至於累民若捐監則各出其有餘以輸之官於市價原無關礙是外省多收監穀採買卽可以久停於倉儲民食兩有裨益若在戶部收捐發銀各省糴穀仍是未停採買也著將戶部捐銀之例停止其各省捐監生俊俱令於本地交納本色至捐監穀數從前所定不無過多之處今照各省時值酌定其穀數如江南每監生一名捐穀二百二十石今江南米價時值一石七八錢不等若照例收穀二百二十石則值銀一百八

十七兩捐者仍必觀望不前今應照穀數減二每穀一石酌以六錢計算每名收穀一百八十石如將來穀價平減該督撫具奏到日仍照舊例收捐其各省如何照此酌減並官吏需索勒捐等弊如何嚴行查禁之處著該部速行妥議具奏○乙亥 上親耕藉田○丁丑張楷卒以阿爾賽爲戶部尙書鄂彌達爲湖廣總督荆州將軍遷

三月庚辰撥直隸保安等三州縣屯豆運京平糶○癸未以汪由敦爲工部尙書李元亮爲戶部右侍郎

由副都統遷

○丙戌 上以西

藏郡王頗羅鼐之子公珠爾默特策布登等經理準夷進藏防範

合宜優賚之○丁亥召楊錫紱來京以託庸署廣西巡撫納敏署

廣東布政使王廷諍署福建按察使

由汀漳道署

○戊子禁臺灣武職

任所置產○辛卯

上詣

黑龍潭祈雨○癸巳改廣西舊隸右

江之泗城府隸左江道腹地之潯州府隸右江道○丁酉諭科場
乃國家大典必期遴拔真才以收實用積習相沿學臣於科舉之
外復有錄遺大收等事臨場之際督撫大吏又將不取者不問文
藝之優劣盡送入場濫觴已極是以上科經臣工條奏朕敕令九
卿定議每舉人一名准取科舉百名此亦不爲不多矣夫國家之
所以慎重科舉者原欲士子奮力於學業試官盡心於蒐羅以副
掄才之典也今科臣吳煒乃請仍照舊例並舊廣收則士子見入
場之易不肯專心學問將應試者日益眾多主考官不過一二
十人爲期不過二三十日豈能精心校閱盡得真才且試卷旣多
而中額不廣則多取科舉仍屬無益若因此而議加中額則見在
舉人非二三十年不得一官亦斷無因候選者多而議增天下職
官之理不幾終身無仕進之日乎所謂及鋒而試者何居是中額

尙應酌減卽科舉百名亦屬浮多止因積習旣久不復議裁朕方
自咎不免姑息而况可展轉增添無所限極耶總之此輩非能爲
國家實心求賢以佐國是不過取悅士類釣譽沽名動以人文日
盛爲辭實則使士子徒懷僥倖之心不肯黽勉向學而國家亦不
得收登進之實效也吳煒識見卑淺特行曉諭並使眾知之吳煒
又稱順天鄉試南人看北卷北人看南卷則南人無所展其長北
人不能勝其任等語向來順天鄉試原未定有分閱之例後因臣
工條奏恐有弊端是以敕令南北各自迴避但思文字短長南北
原有微別且房考南人多而北人少士子則北卷少而南卷多人
多而閱卷少未免於閒曠人少而閱卷多又患其不精且主考全
閱通場房官卽有營私之處主考豈肯任其蒙混則作弊之源不
在乎此自可無容膠柱鼓瑟其順天鄉試閱卷之處著仍照舊例

行至吳煒所稱今當望雨之時適多士鬱望之際等語此言甚爲悖謬目今場期尙遙士子何人自知不在百名之內而卽懷鬱望之心且雨澤未降與科舉多寡何涉而吳煒乃欲借此爲言期朕必從其奏乎朕於人言不可者不行可者則自行之從不以人廢言也吳煒牽引無理之處甚屬不合著嚴飭行○命大學士尙書侍郎舉堪膺試差人員○辛丑諭人君以養民爲急務養民之道在使之上順天時下因地利殫其經營力作以贍室家非沾沾於在上之補苴救恤遂長恃爲資生之策也在昔善圖國是者謂以君養民則不足使民自養則有餘誠不易之論國家歲轉漕粟以實京師乃備天庾之出納關繫最重或因偶遇災歉萬不得已而爲截留之計僅可聞一行之豈遂視爲常法今內外臣工動以截漕爲請朕念切民依亦屢次允從出於一時之急濟其實京倉所

貯雖云可備五年可備十年要僅爲官俸兵餉所必需若統爲京師人民計卽一二年恐亦不足供支况欲更分此以賑貸直省何未之思也漢文景閒太倉之粟陳陳相因至紅朽不可食彼時豈無一方之凶歉而未聞輕議分減者誠以經國之大計務籌久遠在官在民於內於外莫不各有本圖舍本圖而謀兼濟事多未便勢且不能一有虧則兩俱損伊古以來無取焉上年各省倉儲需米孔亟朕因偶爾變通將江蘇安徽浙江江西湖北湖南六省漕糧各留十萬石於本省並著江蘇浙江各將米十萬石運往福建江西將米十萬石運往廣東又因直隸天津河閒被災前後撥通倉八十萬石備賑今年又令山東截留二十萬石分貯接濟凡此皆因民命所關不得不變通辦理若小民不知各務生計而惟官糧是賴無論官兵之外斷不能徧給窮黎卽近漕之處可以議截

留其邊遠省分更無漕可截留又將何以取給乎朕思一方之地
利原可以養一方之人一家之人力原可以養一家之人古者九
職任萬民一曰三農生九穀二曰園圃毓草木三曰虞衡作山澤
之材四曰蠲牧養蕃鳥獸何一非資生養贍之術爲民父母民事
卽家事宜實心勸課隨時區畫使地無遺利民無餘力則家有蓋
藏自可引養引恬俯仰不匱儻督撫不能董率有司有司復不以
田里樹畜爲事及歉收之年但請給發倉糧截留漕米爲督撫有
司備賑之良策將使民間謂水旱可以不備不圖自食其力甚至
游惰成風舉身家衣食之切務皆委之在官是非愛之實以害之
矣天下之大億兆人民之眾惟正之供止有此數焉得人人而濟
之用是特降諭旨通諭直省督撫並飭守牧等官各思所督何事
所撫何事所稱知府事知州知縣事實應知何事凡以爲民計卽

所以爲身計既爲民計而不使民知各自爲其身計其能爲民計者幾何繼自今督撫尙各體朕心毋忽民事懇切開導並勸良有司務使百姓各知自謀以裕生養之源不徒望恩倖澤而恩澤之加斯實足以利濟則豐年樂其降康歉歲可恃無恐朕願與諸臣共勉之○以楊錫紱爲禮部侍郎

原任廣西巡撫

夏四月戊申朔特建先蠶壇工竣○庚戌諭雩祭之典所以

爲百穀祈膏雨也從前大臣等定議一應禮儀悉照恭祀圓丘

之制行朕思目下畿輔雨澤愆期此次舉行雩祭正望恩迫切

之時非每夏常雩可比其先期前詣齋宮及祭畢回鑾朕俱御常服不乘輦不設鹵簿不作樂以示虔誠祈禱爲民請命之意○辛

亥建雲南昆明等三十二州縣棲流所○乙卯上親詣園丘

行雩祭禮○明德因事解任以徐德裕爲湖南按察使

由江南淮揚道

遷

○丙辰免黑龍江官莊被旱災民額糧○丁巳命直隸撥銀十

萬兩於河南採買米石○乙丑諭順懿密太妃侍奉皇祖三

十餘年淑慎溫恭慈祥和易誕育賢王壽踰七袞福德兼備亦史

冊所罕見朕心敬禮虔祝康甯近日體中違和方期調治痊可今

日聞病勢沉重朕已降旨親往看視乃啓駕之先奏報太妃薨

逝本日朕不便遄往俟明日殯殮之後躬親奠醴輟朝三日著和

親王大阿哥穿孝一應典禮該部內務府察例具奏○撥部庫銀

三十五萬兩於直隸備餉○丙寅上奉皇太后詔順懿密

太妃宮致奠○己巳以旱命刑部清理庶獄直隸如之○庚午命

撥山東山西河南耗羨銀八十萬兩於直隸備賑○癸酉以呂熾

爲工部侍郎由內閣學士遷○甲戌免直隸大城等十二州縣民欠○乙

亥以王會汾爲內閣學士由詹事遷○丙子設熱河兵丁子弟官學○

五月己卯諭：春以來雨澤稀少，二麥黃萎，今逾芒種之期，甘霖猶未普降，切恐秋禾難以布種，民食堪虞。朕心憂灼，思過省愆，無一時之暫釋，朕詣暢春園問安。皇太后雖慈訓屢頒寬慰，朕躬而每見皇太后以天時亢旱憂形於色，朕心更爲不甯。今日

皇太后從寢宮步行至園內，龍神廟虔誠祈禱，朕敬聞之下，惶恐戰慄，此皆朕之不德，不能感召天和而累母后焦勞至於此極。爲人子者，實無地可以自容，卽刻前往請安，諄懇謝罪，恐眾不知，以爲別有他故，並諭內外臣工知之。○庚辰，禮部以端陽節請改告祭。太廟齋期，上不許命於初五日齋戒，初八日致祭。○

癸未，御製告風神文，遣平郡王福彭告祭。○甲申，御史柴潮生奏古來東南未闢，王畿侯國皆在西北，王畿不過千里，餘遞減至五七十里，地可謂狹矣。一夫受田百畝，周制六尺爲步，百步爲畝。

僅當今二十六畝有奇田可謂少矣而祭祀之案盛賓旅之既廩
君卿百官吏人之祿入賑貸之委積戰陣之芻糧無不取給於此
費可謂廣矣而且三年耕有一年之食九年耕有三年之食今之
天下卽古之天下何無備之甚也則以田制旣已盡廢水利亦復
不修平日鹵莽而薄收一有急則待賑恤爲活計而已矣查河閒
天津二郡經流之大河三日衛河曰滹沱河曰漳河其餘河閒府
分水之支河十有二潞水之淀泊十有七蓄水之渠三天津府分
水之支河十有三潞水之淀泊十有四受水之沽六是水道之至
多莫如此二處故河閒號爲瀛海山東之水於此而委輸天津名
曰直沽畿輔之水於是而奔匯若蓄洩有方卽逢旱歲灌漑之功
可救一半卽不然而平日之蓄積亦可撐支數月以需大澤之至
何至拋田棄宅挈子攜妻流離道路哉雖其事屬已然言之無益

然水利之廢卽此可知今甘霖一日不足則賑費固不可已臣竊以爲徒費之於賑恤不若大發帑金遣大臣將畿輔水利盡行經理既可接濟災民又可潛消旱潦而且轉貧乏之區爲富饒一舉兩得轉敗爲功直隸爲禹貢冀州之域田稱中中今日土壤乃至瘠薄東南農民家有五十畝十口不飢此閒雖擁數頃之地常慮不給可怪之甚也雖其土燥人怠風氣異宜亦不應懸殊至此漢張堪爲漁陽太守於狐奴開稻田八千頃民有兩歧之歌狐奴今之昌平也北齊裴延儁爲幽州刺史修古督亢陂溉田百萬餘畝爲利十倍督亢今之涿州也宋何承矩爲河北制置使於雄鄭霸州一帶興堰六百里灌田初年無功人咸病之次年大熟承矩輦稻米入都示朝臣謗者乃息邊民之食以充明汪應蛟爲天津巡撫欲興水田將吏皆不欲應蛟乃捐俸自開二千畝畝收四五石

惟旱稻以鰥立槁於是軍民始信今東西二淀卽承矩之塘樂天津十字園卽應蛟水田之遺址又查國朝李光地爲巡撫請興河開水田言涿州水占之地每畝售錢二百尙無欲者一開成水田畝易銀十兩上年直督高斌請開永定河灌田亦云查勘所至眾情欣悅又臣聞石景山有莊頭修姓家道殷實能自引渾河灌田比常農畝收數倍旱潦不致爲災又聞蠡縣亦有富民自行鑿井灌田愈逢旱歲其利益饒又聞見在霸州知州朱一蜚於二三月間曾勸民開井二千餘口今頗賴之則水利之可興也決矣今請特遣大臣一員齎帑金數十萬兩前往河間天津二府督同道府牧令分委佐貳雜職除運道所關及滹沱正流水性暴急慎勿輕動其餘河渠淀泊凡有故蹟可尋者皆重加疏濬而又於河渠淀泊之旁各開小河小河之旁各開大溝皆務深廣度水力不及則

止節次建立水門遞相灌注旱則引水入溝以溉田潦則放閘歸河以洩水其離水遼遠之處每田一頃掘井一口十頃掘大塘一口亦足供用其中有侵及民地並古陂廢堰爲民業已久者皆計畝均勻撥還民情自無不踊躍樂從卽將見在之賑民與遞回之流民停其賑給按地分段派令就工逐日給與工值酌濟二三人口糧甯厚毋減一人在役停其家賑糧二口二人在役停其家賑糧四口其餘口與一戶皆不能執役者仍照例給賑其疏濬之後有可耕種者卽借予工本分年徵還更請另簡大臣一員齎帑分巡直隸各府一如河閒天津二府辦理雖所費繁多而實爲畿輔興無窮之利與議賑迥然不同然而或曰北土高燥不宜稻種也土性沙鹹水入卽滲也挖掘民地易起怨聲也且前明徐貞明行之而立敗怡賢親王與大學士朱軾之經理亦垂成而坐廢可爲

明鑒臣則以爲九土之種異宜未聞稻非冀州之產見在玉田豐潤杭稻油油且今第爲興水利耳固不必強之爲水田也或疏或濬則用官資可稻可禾聽從民便此不疑者一也土性沙鹼不過數處耳且卽使沙鹼而多一行水之道比聽其衝溢者不猶愈於已乎不疑者二也若以溝渠爲損地此尤非知農事者凡力田務盡力而不費多今但使十畝之地損一畝以蓄水而九畝倍收與十畝皆薄入孰利况損地者又予撥還不疑者三也至於前人之履行屢罷徐貞明有幹濟之才所言亦百世之利其時御史王之棟參劾出於奄人勳戚之意其疏載在省志不過言滹沱不可開耳未嘗言水利不可行也但其募南人開墾卽以其地予之又許占籍是奪北人之田而又塞其功名之路也其致人言也必矣至營田四局則成績具在公論難誣但當日效力差員不無奉行不

善之處所以賢王一歿遂爾廢之非深識長算者之所出也凡始
事難成事易廢續以終之則是中道而棄之則非不疑者四也今
日生齒日繁民食漸絀苟舍此不爲經理其餘皆爲末節臣愚以
爲盡興西北之水田盡闢東南之禁地則米價自然平減閭右立
致豐盈但其事體至大請先就直隸爲端俟行之有效次第舉行
得旨大學士會同九卿速議具奏○丙戌諭軍機大臣等前據部
選藁城縣知縣高崧呈請自備工本開採礦廠一事戶部議令發
與喀爾吉善查議朕思此事於地方甚有關係必不可行可寄信
前去卽停止並不必聲張直隸總督高斌尋奏前准戶部密行藁
城縣知縣高崧請自備工本於嶧滕費及淄沂平陰泰安等山開
採銀銅鉛礦臣查山左開礦之說聞明嘉萬間到處開採積歲無
獲官民重困至我朝康熙五十八年巡撫李樹德奏請開濟竟青

登四府礦場以佐軍需 聖祖仁皇帝恐其擾民差部員六人前往試看無益卽停止蓋開採礦砂向惟於滇粵邊省若山左中原內地從未舉行而沂州泰安山屬岱嶽費滕嶧縣地近 孔林更屬不宜且開鑿之處官役兵弁必有不能不擾民之勢若致開掘民間廬墓更易滋怨況利之所在易集奸匪爭鬪之釁必生更可懼者去冬彗星所指僉稱在齊魯之方今開礦適當其地是於事則無利而有害於地方則甚不宜於輿情則甚不願若必俟試行無益而後中止萬一有奉行不妥之處將爲盛德之累得旨所奏甚是朕竟爲舒赫德所欺有旨諭喀爾吉善停止矣○丁亥命京師四路設廠平糶○辛卯雨○乙未以葉一棟爲內閣學士由詹事遷○丙申 上以雨澤霑足命直隸資送流民回籍鄰里代耕田畝仍於秋收後算還工費○壬寅以興修直隸水利命協辦大學士

劉於義往保定會同高斌籌畫○癸卯調張廷琛爲內閣學士以

趙宏恩爲工部右侍郎

由副都統遷

○大學士鄂爾泰等議奏副都御

史勵宗萬奏普賑興工所費不貲請於江南限滿停捐後改於直
省收捐見在樂善好施之例雖經減四終覺太多其途亦尙可增
益請照雍正五年怡親王等題定營田事例分班銓選查從前直
屬被水興舉營田事例至乾隆七年兩淮水患上下兩江又議開
樂善好施事例今直屬疊被災傷賑恤工作需帑浩繁該副都御
史請照例開捐彌補工賑之費實權宜應行之舉惟是捐納人員
急公效力藉爲進身之階必須力所能爲庶免逡巡觀望江賑例
款自減四收捐較原定銀數已屬從減該副都御史以爲數尙多
其途尙可增益請照營田舊例收捐查營田事例與戶部糧運事
例輕重髣髴應將江賑例內除與營田糧運事例相同並多寡不

甚懸殊者毋庸更正外其有較二例過輕過重之條悉照二例酌爲增減並將舊例所有江賑所無者酌量添入另定條款照營田糧運之例在戶部收捐至於郎中員外主事知府知州知縣若准一槩捐升恐礙正途今各款既議加增其途已廣應酌定京官自中行評博以下外官自同知以下准捐仍令吏兵二部將各項滿漢文武應增應減之項作何分班銓選之法詳加參酌具奏遵行從之○甲辰裁湖廣漢陽岳州等營戰船○是月署湖廣總督鄂彌達湖北巡撫晏斯盛奏荊門州七寶山地方民家產麟得旨覽汝甚務此外飾朕所不取豐年爲瑞汝豈不知耶○湖南巡撫蔣溥奏楚南山澤樹木中有青岡櫟木等樹均可放飼野蠶且桑蠶每歲止獲利於春而山蠶可兼收於秋據道州辰州報稱已於四月間成繭絡絲州民無不懽忻鼓舞並將養蠶收種繰絲始末載

爲規條一冊臣刊刷頒發各屬令依照領種放養報關○四川按察使倉德謝恩得旨汝因去歲謝濟世一案秉公是以朕嘉悅擢用但汝究屬守有餘而猷不足者當時常勉力學習若能推此一事諸凡皆如此不顧私情而惟公事是務斯善矣

六月己酉大學士徐本以病乞休允之加太子太傅○癸丑召范

璨來京以準泰署安徽巡撫

由兩淮鹽政署

○甲寅禮部議奏河南學政

右通政林枝春奏豫省標立三教名目立堂設像至五百九十餘處使萬世之師屈居釋道之下舉事不經誣民實甚競施耗產以蔑典常請敕該撫嚴行禁止應如所請並令查明通省書院義學宜於安奉聖像處漸次奉迎安設僧道酌令遷於別寺觀居住其佛老諸像亦聽其移奉並移知各省一體禁止從之○庚申添設通州官米局○乙丑申嚴江南捕蝗不力處分○丙寅免江蘇山

陽等七縣衛七年被災蠲餘銀米○辛未諭湖南巡撫蔣溥奏稱
鹽驛道謝濟世以該道養廉不敷公用會同布政使長柱詳請於
司庫內再支養廉銀千二百兩合計公費共五千兩辦公庶不拮
据謝濟世又稱去年被參之後此地紳士頗有爲濟世鳴冤者因
此往來熟識今復補授道員凡受理詞狀之處若從公決斷則理
短之人必多怨謗此輩甚屬可懼懇求代奏調補廣東臣訪得紳
士等實多與謝濟世往來並有拜爲門生者且捏造私書謬附輿
論種種誣幻任意褒譏臣已嚴行禁毀不敢奏陳謝濟世年已老
邁每常託疾在署復自稱與紳士情熟礙難辦事卽其不能表率
僚屬可知合併奏聞等語謝濟世係獲罪發遣之員朕特赦回用
爲湖南監司昨在湖南任內誤被許容參劾經朕降旨開復仍用
爲湖南鹽驛道乃伊不知感激朕恩乖張狂妄且欲徇紳士之私

情而忘國家之公義又復自請調補廣東尤無忌憚之甚非人臣之體況伊見得養廉較之他省道員已加倍豐厚而伊不知止足更請加增甚屬無恥蔣溥旣奏其老邁有疾著勒令休致回籍

東華續錄

乾隆二十

臣王先謙敬編

臣周瀚恭校

秋七月戊寅調馬爾泰爲閩浙總督那蘇圖爲兩廣總督○癸未
諭上年謁陵經過州縣旗地照民地免額賦十分之三○命廣
東開爐鑄錢○丙戌免江蘇安徽雍正十三年逋賦○甲午予故
盛京兵部侍郎阿山祭○丙申兵部議覆直隸總督高斌奏天津
城守都司陳嘉言母老無人侍養請改補本省等因查武職官員
並無因父母年老改歸本省補用之例所奏未便允行得旨向來
原有文員親老調補近省之例武職雖與文員不同其爲養親則
一但改歸本省補用殊多未便若於附近省分改補亦屬可行著
該部另議具奏尋議請照文員親老改補近地之例發往該員原

籍附近省分交該督題補俟養親事畢仍補直隸天津城守營都司原缺各省一體辦理從之○辛丑諭近來外省吏治率多欺蔽卽如江南浙壑關乾隆六年十一月至七年十一月稅銀缺少一案經戶部駁查去後今巡撫陳大受署布政使愛必達查奏覆稱實係按月計算未經減少並無絲毫侵隱等語朕之裁減各關稅課並免米麥稅銀無非普惠商民之至意從前有旨贏餘減少戶部不必過於苛察惟令督撫就近查奏乃自有此旨之後各處所報贏餘無不減少者而督撫之查奏不過虛應故事該管官員未必全無染指或委用不得其人旁有透漏該員以正課不虧遂爾疏忽究之非實在徵收之數目其奏報短少緣由則皆以年歲不齊爲詞豈有各省之殊數年之久歲收盡皆不齊乎至督撫之查覈亦止據屬員回覆並無實力查出略有異同者近來部中竟有

以此等爲刊板彙案之語此豈成政體哉故自減免稅課以來米
豆價值仍然昂貴而於商民未見有益於稅課日見有虧轉使官
吏得以高下其手也朕頗覺其弊用頒此旨通行訓飭朕旣寬免
稅課數百萬兩之多豈較量此些小贏餘之數各督撫及司稅官
員毋得錯會朕意以報增贏餘爲念但嗣後務須覈實辦理無欺
無隱不得視爲具文朕從前降旨時會計之臣有云此旨若下各
關稅必至一年少於一年者朕謂之曰此弊朕豈不知但得商民
獲一分利益則雖稅額缺數分亦可不顧行止者終必敗露海保
輩卽明驗也以今觀之商民並未得一分利益則大非朕從前降
旨之本意矣而必令符朕前旨則又非朕所厚望於各督撫及司
稅者也○甲辰免甘肅肅州九家審民欠牛具銀兩○是月署湖
廣總督鄂彌達湖北巡撫晏斯盛奏據襄陽縣知縣郭芝報該縣

見產嘉禾有一莖兩穗一莖三穗者穗長六七寸不等洵稱上瑞
理合貯匣繪圖具奏得旨嘉禾之可喜者以閭閻盡得豐登爲貴
耳若夫九穗雙歧碩大且長而不能千畝攸同亦何足異耶

八月丙午吏部尙書公訥親奏遠科舉人多屬衰庸如截取得選
知縣姑令赴任察其不能稱職然後降調改教則事務已多廢弛
嗣後請擇年力尙强者分部學習一年期滿果堪勝任再請歸班
選用舉人既經停選其應得各缺暫令進士抵選吏部左侍郎田
懋奏分部學習之例雍正年間曾行之爾時並未辦事畫彙第於
數日內偶一進署無事而歸堂官並難稽其勤惰何由察其才識
是以旋行停止况各省州縣之缺其選用班次外省升任題補之
人與進士教習期滿捐賑議敘等項外多才幹退而大不可問者
何項無之甯獨舉人要在爲督撫者加意整飭耳應請仍照舊例

選用但令吏部過堂時詳加驗看九卿驗看時不得稍爲姑息加
意甄別儻再有年力衰邁者引見時自難逃洞鑒至該員到任後
令督撫不時稽察如不勝任勿稍姑容則例不更張而衰庸自退
矣得旨訥親之奏朕不卽以爲至當而必可行但其摺內所云姑
令赴任卽督撫察其不能稱職亦須待至一半年而此際事務廢
弛已多則深中時弊而姑息一人貽誤一方此咎朕亦不能自解
卽田懋摺內所云加意甄別豈非朕向日所諭九卿者乎汰之不
勝汰而日久復成故套矣此用人之難也如訥親所奏進士必喜
而舉人謗之如田懋所奏舉人無屈而吏治有妨展轉思維朕亦
不得良策將此一併議奏尋議請定三年一次揀選於每科會試
榜發後奏派大臣除甫經中式者毋庸揀選外其餘前科舉人通
行驗看擇年力强健質地明白堪任縣令者列爲一等各按科分

名次銓選至下科揀選時除上次不列一二等者不准再揀選外再將入選而尚未用並下次應揀選之人挑足五百名爲定數遇各省需人與別項應挑人員一體揀發至教職一項訥親原奏內云凡進士拔貢出身者尚多年力壯盛其恩歲等項類皆衰老難用應一併酌議等語請將會試舉人揀選知縣外再擇年力精強堪司訓迪者列入二等仍各按科分名次照就教舉人班次以教諭銓選其揀選一二等外之舉人准其改教以教諭管訓導事與歲貢分缺銓選再恩貢之應選教諭歲貢之應選訓導各員應於每科鄉試後令各督撫學政大加淘汰除衰憊無用者給以應得職銜休致外仍各註冊備選至該員輪選時應令該督撫詳加驗看從之○丁未諭臺灣雍正七年以後升墾田園欽奉 皇考諭旨照同安則例升科後經部議以同安科則過輕應將臺地新墾

之田園按照臺灣舊額輸納朕念臺民遠隔海洋應加薄賦之恩以昭優恤除從前開闢田園照依舊額毋庸減則外其雍正七年以後報墾之地仍遵雍正九年奉旨之案辦理其已照同安下則徵收者亦不必再議加賦至嗣後開闢田園令地方官確勘肥瘠酌量實在科則照同安則例分別上中下定額徵收俾臺民輪納寬舒以昭朕加惠邊方之至意○戊申免江南鳳陽淮安二府雍正十三年逋賦○甲寅唐綏祖以擅動庫帑假公漁利革職調帥念祖爲廣西布政使以慧中署西安布政使由給事中署○乙卯兵部左侍郎舒赫德奏科場額中舉人一名向止錄取科舉三十名嗣後增至六十名近來部議增至百名本爲江浙人文較盛故寬以收之至中邊小省固有不同不得濫取以足額請照百名之數遞加裁減得旨此奏是大學士九卿議奏尋議直隸江南浙江江

西湖廣福建等六大省每舉人一名錄科八十名山東河南山西
廣東陝西四川等六中省每舉人一名錄科六十名廣西雲南貴
州等三小省每舉人一名錄科五十名順天中式滿合二字號共
四十一名奉天夾字號四名宣化旦字號四名長蘆等處鹵字號
一名南北皿字號七十八名中皿字號每二十卷中一名以上各
字號見應試人數雖屬無多亦應令該學臣及監臣等嚴加考試
務取三場精通方准錄送卽應試人多亦不得過八十名之額兵
部考試馬步箭合式方准一體入場外省督撫等衙門亦不得復
行大收從之○戊午兵部左侍郎舒赫德奏科舉之制徒尙空言
不適實用墨卷房行轉相鈔襲經義各占一經擬題應試表判策
問亦皆豫擬成文隨題敷衍請採本清源別求遴選眞才之道得
旨大學士看尋議科舉之法自明至今皆出時藝窮其流弊誠有

如舒赫德所奏者然謂時文經義表判策論皆空言勦襲無適於用此正不責實之過耳夫時藝所論皆孔孟緒餘作文者必於聖賢義理融會貫通而又參之經史子集以發其光華範之規矩準繩以密其法律然後得稱佳文雖曰小技而文武經濟之才皆出其中未嘗不適實用也乃因積久弊生不思力挽末流之失而轉咎立法之非不亦過乎卽經義表判策論苟求其實亦豈易副今若著爲令甲經文與四書並重其餘必淹貫詞章而後可以爲表必通曉律令而後可以爲判必論斷有識而後可以爲論必通達古今而後可以爲策凡此皆內可見本原之學外可驗經濟之才何一不切於實用儻必變今之法行古之制如鄉舉里選法非不良但上以實求保無下以名應若乃無大更改而仍求之語言文字之間則論別真才惟懲循名之失求責實之效由今之道振作

而補救之而衡文課士者果能力除積習杜絕僥倖將見文風日盛而真才日出矣蓋立法取士不過如是無事更張定制爲也得旨所議是○庚申諭國家設科取士原欲遴選真才以備任使典至重也近來士習不端不惟文風未能振起抑且懷挾作弊行類穿窬詭計百出竟有意想所不到者朕早已聞知屢行訓飭今年順天鄉試特遣親近大臣嚴密稽查頭場拔出夾帶二十一人其四書三題係朕親出不過取其略令不在外間擬議之中而場內多人遂爾閣筆交白卷者六十八人不完卷者三百二十九人真草違式及文不對題者二百七十六人頭場如此伊等尙不知儆二場仍有拔出夾帶者三十一人及見稽查嚴密臨點名時散去者竟至二千八百餘人之多士子品行如此學問如此是全仗懷挾作弊以爲應試取功名之具而猶且嘵嘵嘖嘖肆出誹言以爲

按查太過夫不如此按查則盜風且日熾矣風俗澆漓至於此極然朕總不能正己以正士風實增慚愧而言之可爲浩歎者也况所出三題並非在四書之外豈有身列儒林一部四書尙不能通解而公然矢口觀光應國家寶興之典乎生員由學政錄科貢監由祭酒等錄科伊等所司何事而將不能終卷之人濫行咨送甚屬不合著交部察議嗣後文藝荒疏者俱不准錄送京師旣然若此則外省防檢疏略瞻徇情面苟且姑容奸弊叢集亦不問可知士子讀書稽古先崇品行應試之時乃伊等進身之始理宜循規蹈矩豈應作奸犯科無論外省之遠朕不復遣人前往查察卽在京師每科委員按檢如防盜賊亦無此政體而爲士子者顧乃頑鈍無恥習爲固然以致人心士風日益隳壞尙何望人才蔚起爲國家宣猷分力之寄乎至於內場之弊則又豫擬題目勦襲雷同

千篇一律總由平日不肯專心向學惟務僥倖於一時希圖利祿
朱子云場屋之文必皆道其平日之學胸中之蘊而不詭於聖人
由是而仕皆供其職勤其事心乎國心乎民而不爲身計試問今
之爲士者能乎不能乎二三場表判策論旣懸爲令甲士子自當
一併留心而平日視爲具文窗下並未寓目惟有臨時鈔寫之一
法若朕亦如四書之命題則不能完場者又不知幾千人矣朕心
不忍是以仍循其舊以全伊等顏面然嗣後若不留心研究如向
之弊因循而不改朕亦將如四書之命題矣彼時莫謂朕不戒而
視成也不然者豈科場之題例應士子自擬不應獨開生面乎從
來爲治之道貴乎覈實一切因循姑息之習皆當痛除近者士風
之蠹一至於此而好諛之人浮薄之士尙言國家人文日盛以冀
開恩科廣解額者往往有之初不以士習之邪正人品之醇疵爲

念嗣後若有以加科廣額爲請者必加以違制之處分著爲令至於議減中式之額則非眾所樂聞或言士子類皆寒素專藉科目爲進身之階或言一習舉業則不能更爲農商謀生無計甚至有言士心失望或妄生議論或別出事端者此皆毫無識見之人不知爲政之體要國家科目豈爲養老恤貧而設乎若有造言生事者是身投憲網國法具在何能逃於天壤哉夫國家旁求俊乂本欲量能授官以熙庶績若一味濫取廣收如何可得真才實濟見解額已多壅滯日甚舉人需次知縣約非三十年不可得少年登科及乎筮仕已屬衰遲昏憤龍鍾難司民社則是以無用之人塞有用之路既於吏治有妨而伊等當可用之年又未遇應用之會必相率而同歸於無用當此之時爲上者欲棄置之則無罪欲姑用之又不可伊等固自貽伊戚而辦天下事者又安可委曲遷就

以從人便而貽誤公事乎朱子曾言取士之流弊已極不可不一變以今之士習觀之種種醜劣之行既盡已敗露朕明知濫取之爲害精選之有功若仍復大度包荒不爲整頓朕不忍爲也蓋愛惜培養者朕之本懷而慎重清釐者政之大體與其寬登選以啓倖進之門不如嚴俊造以收得人之實此朕寓矜惜於整飭之中曲爲調劑萬不得已之苦衷也其鄉試中額作何量爲裁減之處著大學士九卿會議具奏此次經朕嚴訓以後如果文風日盛士習克端朕又何難停罷諸途專用科目之人並將此曉諭中外知之尋議直省解額酌減十分之一以乾隆丁卯科爲始從之○給事中吳煒奏科場技檢凡情真罪當者固不足惜但以一二十人之不肖累及千萬人露體褻慢恐非所以培士氣而鼓善類且諸臣懸賞之令每拔得一人給銀三兩聞有拔役輩私入紙片以取

利者此中弊竇請敕部詳審真僞以定懷挾確情立法更爲盡善
得旨吳煒所奏知道了科場懷挾之弊甚多勢不得不嚴行按檢
至於投到褻衣之內原屬非體然若果無其人則朕將治哈達哈
等以太過之罪矣而無如竟有藏匿於禪袴中者委查之員何由
豫知其孰爲有孰爲無而分別之則不得不槩行按檢而朕雖欲
全諸士子之顏面竟無辭以責派查之員爲太過矣然此等敗類
必係目不識丁之人而得與觀光之列總由學政濫行錄送以致
紊亂考場清濁不分如此將來學政等如何慎選錄送並按檢等
事如何詳悉定例之處著原議之大臣一併議奏○乙丑 上御
經筵○諭大學士徐本老成謹慎宣力有年今以抱恙懇請回籍
調理朕心眷念特賦詩篇以寵其行並賜御用冠服及內府文綺
貂皮等物令御前侍衛都統永興齋往宣朕諭旨朕於本月二十

五日行幸南苑當親至大學士邸寓慰問之○諭向來主考同考官之子弟俱令迴避不准入場雍正年間蒙 皇考准其一體應試亦未著爲定例是以每科該衙門以應否准其考試請旨朕看近來各科迴避官生多寡不一若遇人少之年則入殼甚易於科場條例亦不畫一自以照舊迴避爲是嗣後不必一體考試○丙寅免直隸天津等三十一州縣上年災民逋賦○戊辰諭昨日順天府尹蔣炳條陳外省中式之人應於榜後覆試一事朕已降旨允行但如何覆試之處未曾奏及各省難以奉行必至參差不一亦屬非體從來科場取士首重頭場四書文三篇士子之通與不通總不出四書文之外今應令中式之人填寫親供時在巡撫衙門內嚴行防範該撫會同學政出四書閒冷二題不在擬議之內者當面考試聽其盡一日之長試畢即將原卷與中式卷一併

解部聽候磨勘如有文理荒謬及不能完卷者該撫該學政不得
瞻徇卽行舉出另行奏聞聽候降旨餘照原奏行該部卽速行文
各省知之○己巳 上奉 皇太后幸南苑 上行圍

九月庚辰帥念祖

以營私解任

以鄂昌爲廣西布政使顧濟美爲

甘肅按察使

由湖北糧道遷

○辛巳除福建閩縣等四十二州縣荒田額

賦○以范璨爲左副都御史

原任安徽巡撫

○丙申免甘肅西甯縣民欠

馬糧○庚子詔以甲子再周

照康熙二十三年例停止本年勾決

徵巡撫

○癸卯命浙江截留漕糧十萬石備賑○是月兩廣總督那蘇圖

奏報到粵日期並請訓諭得旨汝在閩省諸事尙屬合宜惟稍有
因循之意以致與周學健不合則汝之短處耳此後改茲微失以
成全璧則朕之所望者也至兩粵開採一事頗爲目下急務蓋不
開採銅斤何由得裕而辦理稍有不妥諸弊叢生有利什而害百

者不可不加之意也

冬十月己酉諭大學士陳世倌假滿回京著入閣辦事○壬子大學士鄂爾泰等奏京師近年以來錢價昂貴實由耗散多端若不完官爲查禁設法疏通則弊端難杜錢亦無由充裕謹據見在情形公同酌議八條一京城內外鎔銅打造銅器鋪戶宜官爲稽查查京城內外八旗三營地方見有鎔銅大局六處銅鋪四百三十二座內貨賣已成銅器不設鑪鋪戶六十八座外設鑪鋪戶三百六十四座逐日鎔化打造京城廢銅器無幾崇文門過稅之銅每年僅三百萬斤斷不敷打造之用勢必出於銷錢應將鑪座鋪戶於京城內外八旗三營地方見在查出官房三十六處計七百九十一間卽令伊等搬住開設鎔銅打造其所住房免納官租一年以作搬移之費一年後照例納租所有官房內開設各鋪戶交步軍

統領等衙門派撥官弁稽查將每日進鋪銅斤若干並鎔化打造
出鋪銅斤若干逐日驗明如出數浮多卽行稟報根究一京城各
當舖宜酌量借給資本銀收錢發市流轉查京城內外官民大小
當舖共六七百座錢文出入最多見在平減錢價各當舖如得官
借貸本收錢上市發賣在當舖既多添資本而在市逐日又多添
錢文發賣兩有裨益應將京城各當舖無論官民每大當資本豐
厚應派給銀三千兩聽其營運將所領銀兩存留作本每一日交
制錢二十四串運送官局上市發賣每制錢一串加錢十文爲局
費其賣出銀仍交各當舖收同作本至於小當資本原有多寡不
等有情願借銀者准赴局具呈查明見有架本酌量借給所繳錢
文並賣錢易回銀兩俱照大當一例辦理再借給大小當舖資本
約銀五六十萬兩覈算每日可收錢數千串須設公局收貯派員

經理查有正陽門外布巷市房一所地安門外鼓樓東官房一所
應作爲錢局至收錢發銀造冊文票俱用順天府治中印信爲憑
其局內書算人等令管局官挑補所有市上原賣錢文每制錢一
串內少腰串錢二文以爲局內官役飯食紙張等項之用俟一年
後如果錢價平減將該管錢局官交部議敘儻有侵剋虧那據實
查參一官米局賣米錢文不必存貯局內查八旗內務府設米局
二十七處於乾隆三年三月議准每局給銀二千五百兩作本收
買米石並給糴米二千石平糶其收買糶賣出入銀錢向係各該
旗內務府辦理再本年發給八旗內務府及五城各廠平糶米俱
係將賣米錢三日一次赴市易銀交部各在案今見在議賣官錢
應令八旗內務府將賣米錢不必存貯局內二十七局分爲三班
於三日內每日將九局賣米錢輪流上市易銀仍交各該局收貯

其五城各廠賣米錢亦無庸存貯局內仍照舊三日一次將錢上市易銀交納戶部所有二項上市錢均聽派出管理官錢之員一體發賣一京城各當舖見在積錢宜酌錢數送局一併發市查京城當舖六七百座每於秋冬之際存貯錢最多此項雖係各當舖營運之資本以濟小民一時之緩急但堆積過多未能流通轉於民用不便見在錢價昂貴議開官錢局平價而開設之始錢尙不能充裕在各當舖時當冬令正值閒貯之際應將京城內外大小當舖無論官民每大當一撤出制錢三百串小當一撤出制錢一百串俱自行運送官局交局員發賣陸續易銀給還如運局錢賣將及半各當舖陸續運送補足儻小當一時不能如數令將一百串之數陸續送足交局如已經領借官局資本前項錢免交一錢市經紀宜歸併一處官爲稽查以杜擡價查錢市向設經紀十二

名各鋪戶有高擡錢價者責成經紀嚴諭平減不許壟斷但該經紀等散居各處早晚時價難歸畫一向無專員約束或與錢鋪通同勒索查正陽門外爲商賈雲集之地應令經紀等聚集一處每日上市招集買賣鋪戶商人遵照官定市價公平交易以杜私買私賣之弊一京城客糧店收買雜糧宜禁止行使錢文查京城九門七市每遇秋成外來各種糧食俱係車馬載運投店賣錢卽用車馬運回成千累萬斷不能日用行使或有不肖奸商在彼收買販賣或鄉僻之民收積藏貯應請九門七市雜糧店俱令用銀收買雜糧一京城錢文宜嚴禁出京與販查國寶本貴流通但京城都會之地各省經營貿易絡繹往來奸商將錢裝載出京於價貴處與販射利再閩廣商船由海洋直達天津回空時槩用錢文壓載運至本地買貨又各省漕糧回空亦多載錢文與販獲利京局

所鑄之錢豈能供外省各處之用此等興販流弊不得不嚴查防範應請嗣後出京各商除攜盤費錢外不准將制錢馬駝車載出京一近京地方囤錢宜嚴行查禁查近京直隸所屬各村莊集鎮每多富戶將糧草貨物賣錢去串堆集一室以防盜賊此等鄉愚止圖一己蓄積遂致錢文不能流通向來原有明禁恐日久懈弛應行文直隸總督轉飭各該州縣示諭鄉農富戶不許囤錢至一百串以上臣等伏思京城錢貴之由大約不出八條之內但舉行之初不便於圖利之奸民未免滋物議浮言而於億萬兵民之日用大有利益見既派員經理若不專委大臣督辦恐無統率查錢糧乃戶部所司稽查禁約乃步軍統領專責一切鋪戶商民則府尹所屬應請專交兼管戶部事務尙書公訥親戶部尙書海望步軍統領舒赫德並令順天府府尹蔣炳協同辦理從之○乙卯

上奉 皇太后幸湯山○庚申 幸髻髻山○癸亥 幸盤山○

丁卯 上奉 皇太后還宮○賜翰林院古今圖書集成○庚午

幸翰林院先是 上以翰林院署歲久傾圯發帑重修至是訖

工 御書翰林院扁額賜掌院大學士鄂爾泰曰稽古論思張廷

玉曰集賢清祕敕所司諏吉日送掌院大學士進院親臨賜宴是

日車駕出長安左門設鹵簿掌院大學士及翰林等官跪迎車駕

入謁 先師孔子禮成中和韶樂作 上升殿丹陛大樂作掌院

大學士率羣臣至階下行禮如大朝儀進 御宴大學士鄂爾泰

進爵賜羣臣宴大學士以下翰詹諸臣並部寺科道之由翰林出

身者咸與 上召大學士鄂爾泰張廷玉福敏陳世倌史貽直尙

書彭維新張照汪由敦左都御史劉統勳侍郎阿克敦梁詩正錢

陳羣德齡至 御座前賜酒諭曰時當陽月和煦如春天心訢洽

朕與諸臣交慶之羣臣咸頓首稱賀宣示御製詩題曰乾隆九年十月重葺翰林院落成車駕臨幸錫宴送大學士掌院事鄂爾泰張廷玉進院以張說東壁圖書府五律字爲韻賦東字音字二首敕諸臣各分一字賦詩詩曰撫序權居北占星壁在東斯干歌翰苑於樂豳儒風改殿當年異登瀛此日同三台司道筦二老亮天工樂具卿雲奏筵開湛露融底希光舊史長此贊微躬木天臨翠輦鴛侶集華簪廣學心常切因文道可尋橫汾陰豈昔來泮水猶今禮樂於焉盛觥罍取次斟詩慚得珍字辭喜獻官箴返轡重城暮猶聞歌誦音又以人數爲字所限從臣編檢庶吉士皆不獲與復爲柏梁體御製首句曰重開甲子文治昌羣臣以次廣續成章上舉十八學士登瀛洲事顧大學士鄂爾泰張廷玉曰卿等無愧房杜顧朕弗逮唐太宗耳二臣惶恐避席奏言陛下上

法堯舜過唐太宗遠甚臣等謏劣亦思孜孜日贊少效交修之責
然限於才力愧出房杜下有負 聖諭因頓首謝 上又以昆明
池賦詩事諭羣臣曰翰林之責惟在文章要貴因文見道爾諸臣
當明體此意羣臣竦然敬聽復頓首謝宴畢賜樂善堂全集性理
精義各一部及綺絹茶果有差 上起更衣復宣示 御製七言
律詩四章詩曰歡騰芸署小陽春此日崇文引席珍顧我慚爲房
杜主豈伊獨數馬鄒臣石渠典故應增舊壁宿光華更覩新影麗
花輒爭到八儘教霑醉酒三巡瑞旭曠隴靄扇鸞筵開翰墨會衣
冠五車四庫從來紀劉井柯亭取次看玉版揮毫盈鳳沼花資賜
茗擘龍團濟川自古資舟楫便欲因尋學海瀾昌辰天祿集鵷聯
欣詠斯干小雅篇鳥革翬飛躋君子誦詩講易共高賢光疑黼座
垂華藻篆繞猊鑪散瑞煙咫尺玉堂清切地底誇瀛島說登仙百

年禮樂慶昭融保泰常持惕若衷漫以新詩鳴豫大誰將忠告贊
欽崇傳巖夢賚應無藉唐室賡歌訝許同心喜百僚知我意不將
高議詡升中駕興隨幸貢院頒賜 御書額曰旁求俊乂聯曰立
政在英材慎乃攸司知人則哲與賢共天位勛哉多士觀國之光
並 御製詩曰翰苑瓊筵酌令辰棘闈來閱鳳城闈百年士氣經
培養寸晷風簷實苦辛自古曾聞觀國彥從今不薄讀書人白駒
翺羽傳周雅佐我休明四海春盡道文章接上台菁莪樂育濟時
才千秋得失非虛也咫尺雲泥亦幻哉若有淚眶啼桂落那無笑
口對花開鳳池多少簪毫者都向龍門燒尾來萬里扶搖正翮搏
飛龍利見豈爲干志賢聖志應須立言孔孟言大是難見說經綸
推國士從來桃李屬春官但令姓氏朱衣點那惜三條淚燭殘周
遭園棘院沈沈景物當前總入吟材擬圭璋方特達文歸雅正薄

艱深禹門魚變辭凡水喬木鶯遷出故林寄語至公堂裏客莫教

冰鑑負初心復幸紫微殿觀象臺還宮○召沈起元來京以方觀

承爲直隸布政使陶正中爲直隸按察使

由天津道遷

○是月兩廣總

督那蘇圖等奏承准廷寄御史衛廷璞歐堪善條奏二件請停緩

開採礦山奉旨交臣等定議臣與臣策楞詳查案卷備詢屬員博

採輿論竊惟粵東礦廠自康熙三十八九年以來議開議停已非

一次若兩御史所奏雖因息事甯人起見而臣等仰承下問不敢

不據實上陳查粵省山海交錯五方雜處兵民商賈在在需用錢

文鼓鑄一事萬難緩待而銅斤之產於東洋者江浙等省紛紛購

買尙慮虧缺其產於滇南者額解京局及供應本處與川黔等省

鼓鑄豈能源源接濟今粵東見有礦廠棄而不取非計之得也議

者謂礦廠一開奸良莫辨海寇黎猺劫壠踞山事屬可慮伏惟久

道化成數十年來鯨鯢絕迹別無意外之虞卽如雲南夷獮雜處
粵西苗獍交錯頻年開礦並未滋事惟在司事文武彈壓有方便
可杜絕况粵東山多田少民人雖有胼胝之能苦無耕作之地與
其飄流海外作奸爲盜何如入山傭趁使俯仰無憂是開採非特
爲鼓鑄計兼可爲撫養貧民計也若云本省米穀有限丁眾食指
浩繁查產米地方遠則江楚近則粵西皆一帆可達購鄰省之米
養本省之人有何食貴之慮臣等隨時調劑斷不使粵民向隅如
臺臣所云因開礦而米價卽貴也似宜將見在報出銅鉛各礦先
行試採自廣州肇慶二府起由近至遠以少及多砂弱卽止其衰
旺緣由及應開應停作何抽課之處容試採之後陸續奏聞至金
銀二礦民多競趨恐其先金銀而後銅鉛轉於鼓鑄有礙應請停
止照舊封閉其餘各項事宜悉照戶部議定章程辦理毋庸更改

得旨大學士會同該部議奏

十一月乙亥大學士鄂爾泰等議覆署湖廣總督鄂彌達奏遵旨
交議御史張漢條陳湖廣水利一摺楚水大者曰江曰漢張漢請
疏江之水曰調弦口宋穴楊林市虎渡口采穴龐公渡等處導江
水入洞庭分於支河而殺江之流疏漢之水曰白口操家口泗港
等處導漢水繞三台湖出五通口而殺漢之流查調弦口虎渡口
皆入洞庭之道河路寬深足資宣洩兩岸隄塍屹立無庸置議至
宋穴采穴楊林市等處自宋元來久湮其間隄岸綿互若掘地成
河勢必廢已築之舊隄田地爲墟人民失望豈容輕議又龐公渡
一處明天啓年間曾經開通後因泛溢國朝順治七年堵塞始安
此江水之不能疏也白口操家口距五通口八九百里中間煙火
萬家田疇彌望今若漫議開洩勢將千萬頃之良田胥爲河流經

行之道兩岸隄防之費不可以百萬計況明神宗年間操家口決
官民畢力堵禦崇禎九年又決不能堵禦至國朝順治七年閒用
各縣民夫合築經數十餘年之久始成樂土並非年久淤塞見在
沙洋一隄經前督臣阿爾賽題請動帑興修壅之方懼爲患曷敢
言洩至泗港居天門上流泗港一疏天門殆將爲壑他若通順等
河不通小港水大無能宣洩水小遂成涸澤此漢之不能疏也又
張漢請疏便河郝穴使江水從丫角廟東注則江必入漢今方欲
疏漢以殺其勢而又引江以灌之未便置議張漢又云操家口達
五通口爲漢水故道查禹貢載漢水至於大別南入於江大別至
五通三十餘里非故道也臣思三楚之水百派千條其江邊湖岸
未開之隙地宜嚴禁私築小垵已闢之肥壤須加謹防護隄塍其
各屬迎溜頂衝險難之處長隄聯接每歲責令分管水利各員逐

一查勘督率居民增高培厚寓疏濬於壅築之中此全楚興水利除水害之大槩張漢所請疏洩之處似無庸議等語查興修水利全在便民該署督閱勘江漢二水皆不可疏該御史所奏應無庸議從之○庚辰以朱定元爲內閣學士由光祿寺卿遷○甲申召喬學尹來京以圖爾炳阿爲山東布政使王芥園署山東按察使由直隸道○癸巳準噶爾部人察罕庫克新率屬內附授爲七品官恩賞段布○壬寅諭每月吏部補選各官考試律文已行之年餘率多數衍湊泊而律文浩博律意精微究竟何能明曉不過虛文塞責於吏治無所裨益即使各員能悉實力體究於此而長民之意初別有在反如東坡所誚耳嗣後著停止至於九卿驗看之事行之已久仍照見行例辦理○調兆惠爲刑部侍郎托時爲盛京刑部侍郎

十二月甲辰朔命各省錢穀刑名年終彙冊報部○乙巳撥湖北米十萬石於浙江備賑○丙午大學士鄂爾泰等議覆協辦大學士劉於義等奏查辦直隸水利事宜一宛平良鄉涿州各河溝諸水俱會入牝牛歸於拒馬爲受水之地但河身淺狹淤阻往往瀝水不能導送以致漫溢應將良鄉上游宛平房山境內各河溝照舊例用民力疏通歸入廣陽茨尾二河其宛平之北崗窪趙新店及房良二邑之順水河溝雅河良邑之黃屯河廣陽茨尾二河並良涿之牝牛正支河均應挑濬又通濟橋橋孔低矮有礙水道應將舊橋拆造起高趙新店之南地勢窪下應建橋臺道以通往來一新城雄縣境內白溝河爲拒馬下流眾水歸宿雄縣新城地勢窪下夏秋水漲不能分減應將十里鋪支河一道又三十里支河一道開挖寬深舊有之盧僧河一併開通分減白溝漲汛十九堡

支河五里之下馮家營起直南開河一道接入盧僧河並以挑河之土兩岸堅築子埝自十里鋪起至新橋窰亦築子埝一道又新城南關等處應疊道建橋雄縣王克橋西槐二支河應開它寬深一趙北口淀爲西南諸水匯歸之地內有支河以爲疏消水道由直沽入海其塌河爲蓄蓄北運河洩水之要區由陳家口賈家沽入海應於張青口北另開支河一道分洩又玉帶河之支流爲中亭河張家背河應開展西河之六郎陡應幫築高厚臺山河趙房河之木橋應改建活板通舟一東淀河道爲陵糟漕般往來經由河身迂曲易於淤狹查有勝芳舊河一道東北直注形勢徑捷土人名爲照直河應開通再楊家河自莊西至下河頭應展寬挑深莊東北至中河頭應裁灣取直一子牙河上游爲滹沱河發源山西之泰戲山經直隸衡水縣會滏陽河北注大城縣王家口每

年清渾並漲池南數十百村莊悉遭淹浸及汛退泥停散漫淤墊
應於王家口北莊兒頭起堵截子牙河下流另於陳家泊展開河
身一道改溜東行使清渾永不相溷一正定府屬之井陘平山二
縣民人於各村莊河灘營治稻田均應修理請借給井陘縣民人
工本銀三千七百七十二兩零平山縣民人工本銀五千五十九
兩零按照十年完繳收成後照例升科又正定府屬並定州八州
縣通計營成稻田共六百六十餘頃接連地面尙可開拓應將已
經營成之田查丈清楚造報戶部請撥銀五十萬兩春融次第興
工應如所請得旨依議速行○庚申雲南總督張允隨奏大關境
內鹽井渡通川河道與金沙江相爲表裏奏請開修凡閱三載工
程完竣銅運坦行商貨駢集克收成效得旨嘉獎○戊辰張照丁
憂調汪由敦爲刑部尙書以趙宏恩爲工部尙書

由工部右侍郎遷

○蘇

昌丁憂以都隆額署安徽按察使

由給事中署

○辛未以勵宗萬爲刑

部侍郎何國宗爲左副都御史

由三品頂帶樂部大臣選

○是歲朝鮮琉球來

貢○會計天下民穀數各省通共大小男婦一萬六千六百八十八萬八千六百四名口各省通共存倉米穀三千二百八萬八千九百三十七石九斗九升零